

SON MUREZZA: ballet cu gl star saltunz Sergei Polunin

«Riom ò la miglra ava digl mond»

G.N.S. Igl ballet «Sacré» cun igl star saltunz Sergei Polunin è anfignen oz, dallas tschents e tschents producziuns digl Origen Festival Cultural, bagn sto igl punct culminont. Fiss igl ballet preschento a Son Murezza en hotel, fiss el segl scalem digls hotels da tschintg steilas tgi dat lò varsaquants.

Siva digl 2005 cura tgi Giovanni Netzer, igl intendant digl Origen Festival Cultural ò antschet cun las producziuns, ò el preschento agl public cultura da vaglia, producziuns tg'on incanto igls visitaders e tot chegl tg'ins veva via anfignen oz sa lascheva strusch anc daventar ena pi gronda aventura da cultura. Igl pi tard siva dallas quatter seiras da ballet a Son Murezza è chegl an tots gros betg ple uscheia. Giovanni Netzer ò preschento agl public ena producziun da ballet digl pi fegn, graztga agl star saltunz mundial Sergei Polunin.

Chegl vo angal cun en schi grond star

Cun Yuka Oishi ò Giovanni Netzer catto ena coreografa tgi tgapescha igl sies mastier scu pacas otras donnas aint igl mond da ballet e cunzont er ena persuna tgi fò gugent experimentants scu el sez er. Igl grond ballet scu «Sacré», è avant passa 100 onns nia mess an solt da Vaslav Nijinski per ena pi gronda furmazium da saltunzs. Sergei Polunin saro igl unic artist tgi ò igl curasch da sa sfunsar sulet ainten tot las rollas digl toc sen tribuna da ballet. Cun en star saltunz scu Sergei Polunin sa lascha chegl far e scu via tar las quatter producziuns cun mintgamai 220 persungas ainten la Halla da tgalgar a Son Murezza. En ballet plagn dinamica, forza, perfecziun, eleganza e da gronda classa. Tot chegl vo da far scu producziun per en solist, angal cun en star saltunz da renom internaziunal scu Sergei Polunin.

Revoluziun cun sasez

Aint igl ballet «Sacré» vogl bagn per la revoluziun russa, a Son Murezza era Sergei Polunin sez la revoluziun. Durant 35 minutas, chegl tgi betg en saltunz digl mond fò da fila, ò igl Ucrain interpreto an sia moda igl cumbat cun sies intern, cun sia veta plagn angoscha, plascheirs, muments da speranza, fasas depressivas e cun en avigneir infinit. Cun expressiun, forza, passium, piruetas singularas, ena forza maestousa e cun ena controlla digl corp, ò Sergei Polunin mess sen



Ava da truasch da Riom è per Sergei Polunin, da preschaint igl migler saltunz digl mond, la miglra ava tgi dat.

tribuna igl maletg dalla sia olma, sia veta revoluziunara e schizont rebella. Adegn puspè para el da survantscher la sia revoluziun persunala e chellas scenas ò Yuka Oishi sot-tamess cun musica pi leva, pi romantica e fitg tgoda, messa an notas digl grond cumponist e pianist Frédéric Chopin. Pi ferma, pi aggressiva e pi stagna era alloura la musica, noua tgi Sergei Polunin interpretescha la veria revoluziun an sia veta, musica digl grond cumponist Igor Stravinsky.

Nigna caschung da lipar

La Halla da tgalgar da Son Murezza ò do la culissa allas grondas seiras da ballet. I dess pacs lis scu la halla tgi sa lascha metter an maletg e musica ena revoluziun tg'ins vign betg da survantscher. All'antschatta igl plafung dall'ota halla anc cun en maletg pi coloro tgi dat speranza er alla revoluziun da Sergei Polunin. 14 boras cun ena otezza da vers 6 m èn igl segn tgi vo betg per sasez da mitschier dalla revoluziun. Adegn puspè meidan ellas calour, ellas survignan calours pi tgodas tgi paran d'esser la speranza per neir mester alla revoluziun. Sen tribuna en cranz da figlias setgas, singulas èn anc fres-tgas e verdas e gist ainten chellas catta Sergei Polunin adegn puspè ena minima speranza da tuttegn catar ena veia cun en horizont azzur. La realitad è pero en'otra, el vign ansomma betg fitto cun la sia revoluziun persunala, uscheia tgi or dallas bleras figlias davainta sanc, igl sies sanc tg'el ò pers ainten

igls numerous cumbats per survantscher tot igl mal. Elò schizont pansiert da suizid, ò dantat betg igl curasch persiva.

Bler applaus avant la fegn digl ballet

Igl public ò remunerò igl saltunz cun en applaus tgi ò cuizzo vers diesch minutas. Anc mai via ins ò tar ena producziun digl Origen Festival Cultural, tgi igl public e sa dulzo digls plazz avant tgi la producziun è stada a fegn. Chegl è capito anfignen oz angal cun en Sergei Polunin sen tribuna.

Pi gugent a Riom tgi a Son Murezza

Sergei Polunin è ansasez en star sainza en cunfar d'en star mundial. En de solta el a Londra sen ena tribuna digl ballet roial, igl de siva a Moscau sot tschiel avert davant 20 000 aspectatours ed igl terz de a Vienna all'opra statale noua tg'el vign aduro prest scu Nussigner. Tranter aint catta el alloura anc taimp da neir a Son Murezza per sa preschentar ad en public internaziunal. Per sa revigneir da sies strapatschs mentalis e corporals giolda el la quietezza a Riom scu an nign oter li. Gugent passainta el igl mument sainza solt dasper la truasch anmez Riom, lò noua tgi dat pigl «divin» tranter igls saltunzs la miglra ava digl mond. Vess el la pussebladad da piglier l'ava cun el sen las sias turneas tras igl mond faschess el chegl. Las distanzas dantant èn bagn en po pi lungas tgi angal da Riom a Son Murezza, lò noua tgi l'ava termala è prest «sontga» an cumparaziun cun Riom.